



無錫金匱縣志

卷二十九之三十一

流寓 釋道 物產 祥異

風俗

善舉

義莊

ル 5  
3047  
12





門 6  
號 3000  
卷 12

門 6  
號 2300  
卷 12

門 5  
號 3047  
卷 12

昭和九年  
六月十八日  
購求

宗聞而非之求鴻不得鴻易姓運期名耀字侯光居齊  
魯之間有頃去適吳依大家皋伯通居廡下為人賃舂  
每歸妻為具食不敢於鴻前仰視舉案齊眉伯通察而  
異之曰彼傭能使其妻敬之如此非凡人也乃舍之於  
家鴻潛著書千餘篇及病卒伯通葬之吳要離冢旁

後漢

書有傳

宋

湛挺字茂之官司徒右長史隱惠山築草堂讀書其中與  
南平王劉鑠友善更以詩章倡和留刻於石

唐



陸羽字鴻漸一名疾字季疵竟陵人不知所生或言有僧得之水濱既長以易自筮得蹇之漸曰鴻漸於陸其羽可用爲儀乃以陸爲氏名而字之少日讀書其師苦之甚至亡去匿爲優人太守李齊物異之授以書貌侵陋口吃而辯好聞人善多規切與人期雨雪虎狼不避也隱苕溪自稱桑苎翁闔門著書或行野中誦詩擊木徘徊不得意或慟哭而歸詔拜太子文學不就職羽嗜茶著茶經三篇言茶之原之法之具尤備天下益知飲茶矣時鬻茶者陶羽形置煬突間祀爲茶神御史大夫李季卿宣慰江南聞而召之羽衣野服挈具而入季卿不

爲禮羽恨之乃更著毀茶論其後尙茶成風回紇入朝

驅馬市茶

唐書有傳

李隲涿陽人嘗於惠山寺肄業其詩凡言山中事者悉記屋壁會昌末寺廢詩皆無存隲官至御史中丞上柱國皮日休字襲美一字逸少竟陵人性傲誕隱居鹿門自號間氣布衣咸通八年進士第崔璞守蘇辟軍事判官入朝授太常博士賊巢之亂避地會稽依錢氏卒日休嘗寓無錫與陸龜蒙魏璞泛舟芙蓉湖爲烟水之遊

宋

楊時字中立南劍將樂人熙甯九年中進士第時河南程



顥與弟頤講孔孟絕學河洛之士翕然師之時調官不  
赴師顥於潁昌相得甚歡其歸也顥目送之曰吾道南  
矣四年而顥死又見頤於洛一日頤冥坐時與游酢侍  
立不去頤既覺則門外雪深一尺矣時杜門不仕者十  
年起知瀏陽餘杭蕭山三縣皆有惠政轉荊州教授會  
有使高麗者國主問龜山安在使回以聞召爲祕書郎  
遷著作郎奏言熙甯之初大臣文六藝之言以行其私  
祖宗之法紛更殆盡元祐時盡復祖宗之舊廢熙甯之  
法至紹聖崇甯抑又甚焉凡元祐之政事著在令甲皆  
焚之以滅其跡願明詔有司條具祖宗之法有宜於今

者舉而行之當損益者損益之除邇英殿說書聞金人  
入攻謂執政曰今日事勢如積薪已然當自奮勵以竦  
動觀聽若示以怯懦之形委靡不振則事去矣要害之  
地務嚴爲守備近邊州軍宜堅壁清野勿與之戰使之  
自困若攻戰略地當遣援兵追襲使之腹背受敵則可  
制勝矣又謂今日之事當以收人心爲先人心不附雖  
有高城深池堅甲利兵不足恃也免夫之役毒被海內  
京城聚斂東南花石其害尤甚欲致人和去此三者正  
今日之先務也金人圍京城勤王之兵四集而莫相統  
一時言唐九節度之師不立統帥雖李郭之善用兵猶



不免敗衄今諸路烏合之眾臣謂當立統帥一號令示紀律而後士卒始用命又言童貫爲三路大帥敵人侵疆棄軍而歸當正典刑以爲臣子不忠之戒疏上除右諫議大夫兼侍講敵兵初退議者欲割三鎮以講和時極言其不可曰河朔爲朝廷重地而三鎮又河朔之要藩也一旦棄之北庭使敵騎疾驅貫吾腹心不數日可至京城今聞三鎮之民以死拒之三鎮拒其前吾以重兵躡其後尙可爲也疏上欽宗詔出師而議者多持兩端時又抗疏爭之會李綱罷太學生伏闕上書乞留綱軍民集者數十萬朝廷欲防禁之吳敏乞用時以靖太學遂以時兼國子祭酒奏言蔡京用事蠹國害民幾危宗社論者莫知其所本也蓋京以繼述神宗爲名故推尊王安石加以王爵配饗孔子廟今日之禍實安石有以啟之安石之邪說壞人心術者甚多伏望追奪王爵明詔中外革去配饗疏上安石遂降從祀之列而諫官馮澥力主王氏學上疏詆時會學官有紛爭者有旨罷學官時亦罷祭酒頃之四上章乞罷諫省除給事中辭乞致仕除徽猷閣待制提舉嵩山崇福宮高宗卽位除工部侍郎兼侍讀乞修建炎會計錄乞恤勤王之兵乞寬假言者連章丐外以龍圖閣直學士提舉杭州洞霄



宮已而致仕卒諡文靖方時之渡江也東南學者推爲程氏正宗蓋講學於無錫者十有八年云

宋史有傳

章誼字宜叟建州浦城人崇甯四年進士補懷州司法參軍歷杭州通判高宗幸臨安苗劉爲變人心洶洶帝問羣臣曰今日之事何如浙西安撫司主管機宜文字時希孟輒曰乞問三軍誼越班斥之曰問三軍何義若將鼓亂耶希孟卻立屏息帝嘉之事定竄希孟吉陽軍誼遷二秩尋擢殿中侍御史邵青自太平乘舟抵平江所至劫掠誼請置水軍於駐蹕之地且言古舟師戰守之備詔淮南三宣撫措置誼又獻四策陳宰相黃潛善汪

伯彥呂頤浩誤國狀謂守戰之策有江海必資舟楫戰守之具有險阻必資郡縣防守之力有兵將必駕馭撫循不可爲將帥自衛之資有糧賦必漕運轉輸不可爲盜賊侵據之用四者各付能臣分路以辦重賞嚴罰誰敢不用命哉紹興二年除大理卿宰相奏知平江府帝曰誼儒者賴其奏讞平恕使民不寃勿令補外尋除權吏部侍郎遷徽猷閣直學士樞密都承旨誼奏漢有南北兩屯唐有南北兩衛皆天子自將之兵祖宗所置殿班親軍處禁門之內皆極天下之選今日神武兵萃於五軍多逃亡之餘市井之人殿班親軍侍衛者曾無干



百願酌漢唐南北禁衛之意修本朝遴選班直之法選五軍及諸州各爲一衛合取萬人分爲兩衛則禁衛增嚴王室大競矣金遣使求還劉豫之俘及西北人在東南者又欲畫江以益豫時議難之加以龍圖閣學士充軍前奉表通問使誼至雲中與粘罕兀室論事不少屈金人諭亟還誼曰萬里銜命兼迎兩宮必俟得請金人乃授書并以風聞事責誼誼詰其所自金人以實告乃還至南京劉豫留之以計得歸帝嘉勞之擢刑部尙書累遷端明殿學士江南東路安撫大使知建康府未幾提舉亳州明道宮代還卒諡忠恪誼由丹陽徙居邑之

斗城卒葬橫山

宋史有傳

翟汝文字公巽丹陽人登進士第徽宗時除祕書郎三館士建議東封汝文曰治道貴清淨今不啟上述三代禮樂而師秦漢之侈心非所願也責監宿州稅召除著作郎皇太子就傅命汝文勸講除中書舍人言者謂汝文從蘇軾黃庭堅遊不可當贊書之任出知襄州歷陳州召拜中書舍人遷給事中高麗使入貢詔班侍從之上汝文言不可上遂命如舊制內侍梁師成強市百姓募田廣其園圃汝文言於上師成諷宰相黜汝文出守宣州歷密州密負海產鹽蔡京屢變鹽法盜販者眾有司



窮治黨與汝文曰祖宗法度獲私商不詰所由欲靖民也今繫而虐之將爲厲矣悉縱之欽宗卽位召爲翰林學士改顯謨閣學士知越州兼浙東安撫使建炎改元上疏言陛下卽位赦書上供常數後爲獻利之臣所增者當議裁損楊應誠請使高麗圖迎二帝汝文奏應誠欺罔君父若高麗辭以大國假道以至燕雲金人卻請問津以窺吳越將何辭以對後高麗果如汝文言紹興元年召爲翰林學士兼侍講除參知政事先是汝文在密秦檜爲郡文學汝文薦其才故檜爲相引用之然汝文性剛不爲檜屈對案相詬目檜爲濁氣至是檜劾罷

之汝文風度翹楚好古博雅精於篆籀有文集行世愛

無錫山水之勝由臨安徙居焉

宋史有傳

翁挺字士特建安人博綜羣籍有詩名累官考功員外郎建炎二年罷歸寓邑之膠山有泉名乳竇久湮塞挺坎山得源螿地結宇其上署曰蒙齋爲文記之

胡瑄字德輝晉陵人建炎中避地居邑之甘露鄉宣和三年舉進士第歷遷祕書正字太學生陳東上書攻六賊言者謂瑄嘗潤色其書貶梧州紹興初召試館職復除正字遷著作郎兼史館校勘先是姦臣得志舊史蕪穢瑄筆削忤執政出守嚴州未赴而卒瑄性嗜學旣第後



嘗請事南都劉器之器之曰子聰明能護以至道當成令器理因作護道錄

李琳陳留人宣和間進士父傳官儀同三司高宗南遷父子從至常州傳卒救葬晉陵定安東鄉之柏墓琳因家錫之蓮蓉門琳博學有文章歷官多外服秦檜死復張浚等官琳始登朝為吏部侍郎歷數文閣待制致仕孝宗朝起為吏部尚書卒救葬父墓

陸宗字元珍山陰人尚書左丞佃之子任台州甯海縣丞攝令事遇事立決以治政稱靖康間金人薄都城宗方提舉京畿常平等事以便宜招集成卒數千日夜部勒

扼據要害敵稍引卻未幾罷歸徙居無錫陶墅讀書賦詩優遊以終

嘉慶志云乾隆庚午志宗舊志皆作棠棠係古實字而宗與實通今其字為元珍當從宗又陶墅亦作桃墅見薛提學應旂陸子明墓誌子明宗六世孫也宗本籍山陰罷官始居錫列流寓為允前志載入宦望誤

洪适字景伯父皓徽猷閣學士諡忠宣适初以父使朔方恩補修職郎尋與弟遵同中博學宏詞科後三年弟邁亦中是選由是三洪文名滿天下适除祕書正字累遷中書舍人時金人再犯淮羽檄沓至書詔填委咨訪酬答率稱上旨遷翰林學士奏罷秦檜孫墳予祠并其黨復召者數人進端明殿學士簽樞密院事帝諭三省事



與洪适商量於是東西府始同班奏事累拜尚書右僕射同中書門下平章事奉祠起知紹興府浙東安撫使卒諡文惠遵字景巖以詞科擢祕書省正字薦爲御史訟其父寃曰先臣皓與龔璿同出疆璿仕於劉豫爲豫所誅而秦檜贈以節旄擢用其子先臣拒金人之命留十五歲而歸南竄嶺表臣兄弟屏跡於外高宗曰今以修注處卿拜起居舍人奏以經筵官除罷及封章進對宴會錫子講讀問答萃爲一書名曰邇英記注後乾道間又有祥曦殿記注自遵始累遷翰林學士兼吏部尚書奉祠起知平江府孝宗卽位拜翰林學士承旨兼侍讀以御史周瑛劾罷復起太平州其前守瑛也聞遵來不俟合符馳去遵追餞十里勞苦如平生曰君當官而行我何怨鳩民築圩田凡數萬累拜資政殿學士卒諡文安邁字景廬初入官以忤秦檜出添差教授福州厯除樞密檢詳文字會議欽宗諡邁曰淵聖北狩不返臣民悲痛當如楚人立懷王之義號懷宗以係復讐之意不用金使來告登位且議和以邁爲接伴使奏更禮數十有四事及報聘邁請行以辱命論罷復除起居舍人奏修祥曦記注厯知穎蔡二州拜翰林學士上四朝史一祖八宗百七十八年爲一書累遷端明殿學士致仕



卒諡文敏 並節宋史本傳

舊志适等母魏國夫人沈氏松年之妹忠宣公皓官吳時夫人卒不能辦歸葬於邑之白茅山及皓使金使适等依舅氏居無錫松年教之各以功名文字顯於當世适後遇蔭補舍其孫密而奏松年之子自疆以報焉

薛極字會之武進人以父任調上元主簿中詞科為大理評事累官兵部侍郎嘉定八年疏奏願陛下深思顧諟之難益懷兢業之念勿謂帝德罔愆而怠於進修勿以天災代有而應不以實政綱雖舉必求益其所未至德澤雖布必思及其所未周誓以今日遇災警懼之心永為異時暇逸之戒遷刑戶吏三部尚書拜端明殿學士

參知政事兼知樞密院事封毘陵郡公加少保和國公致仕卒極晚年遷居無錫 宋史有傳

范晞文字景文太學生杭人理宗時與葉李上書詆賈似道竄瓊州元世宗時程鉅夫奉詔求賢與趙孟頫等同薦於朝授江浙儒學提舉不赴以子拱為無錫教授遂即邑之茅場里居焉

周泰臨安人宋末任國子學正元兵至糾眾抗之不克名其子曰思岳思李思文謂武穆忠定信國也後徙無錫思文即偕張義士翼說降莫天祐者文恪子義其後也

元



孟潼字宗鎮世吳人宋信安郡王忠厚五世孫舉茂異爲文學掾累遷松江府判官所至以廉能稱信安墓在無錫又其先世別業在惠山下潼宦遊南北遂歸老焉

陳高字子尙永嘉人至正十四年進士授慶元路錄事明敏剛決吏民不敢欺一日忽棄去方谷珍招致不得嘗留無錫張籌師之東西浙陷浮海謁河南王王欲官之不從卒於邸

焦鼎字德元單父人延祐中進士善書能詩歷工部員外郎遷常州治中因居無錫弟鼎亦能詩

蔣捷字勝欲陽羨人徙居無錫德祐元年進士好著述主義理不事詞華入元遯跡不仕大德中憲臣交薦皆不就家竹山人稱竹山先生

鄭元祐字明德遂昌人博覽載籍文章豪宕邑大姓徐元度楊宏輩延之於家故寓無錫久至正中舉爲平江教授後遷浙江儒學提舉皆以儒職暫赴而歸

元史有傳

王仁輔字文友鞏昌人兩娶皆吳產故多知吳中山川人物作無錫志二十八卷卒於邑梅里之祇陀村無子門人倪瓚瞻之終其身死爲之服執喪而葬焉

王逢字原吉江陰人至正中臺臣薦之稱疾辭避亂於松之青龍江徙上海烏涇又居邑之鴻山自號最閒園丁



又曰席帽山人張氏時逢爲畫策使降元拒明洪武十  
五年以文學錄用不欲行其子掖官通事司令以父老  
叩頭泣請帝命吏部檄止之逢老明世二十餘年而爲  
詩多不忘元年七十卒

明史  
有傳

明

周砥字履道吳人寓居無錫與義興馬治善因之荆溪有  
荆南倡和集義興富人慕之者漸益爲具招砥砥心惡  
之貽書別治遜去歸吳與高啟楊基遊書畫益工已又  
去之會稽馬治字孝常初爲浮屠後從儒善詩能書舉  
茂才知內邱縣遷建昌同知嘗客無錫子桓仲遂定居

焉

明史  
有傳

楊基字孟載嘉州人生於吳中嘗寓邑之城南從丁信遊  
張士誠辟丞相府記室謝去又客饒介所明初以饒氏  
客安置河南後起知滎陽縣累官山西按察使奪職基  
負詩名與高啟張羽徐賁齊名稱吳中四傑

明史  
有傳

徐與老字仲祥錢塘人太學生嘗遊上都屬南北阻絕航  
海歸時兄釋鑑主席惠山亦能詩因寓居倡和有雙清  
集旣卒門人王達爲治喪葬之錫山而志其墓

莫士安字維恭吳興人爲湖學教授張羽薦知黃岡縣遷  
國子助教永樂中治水江南遂家無錫卒



陳基字敬初臨海人嘗辟張士誠幕府去之洪武初召修

元史寓居無錫卒同時有常熟陳方字子貞亦寓邑中

與基及鄭元祐並有名明史有傳

張簡字仲簡吳人初師張雨為黃冠以母老歸養遂返服

居邑之鴻山饒介守吳中延文士作詩簡詩擅場居首

座贈黃金一餅所謂醉樵歌者是也洪武初召修元史

其詩近韋柳王禕序之明史有傳

安明善字汝德祥符人洪武初以人材辟通判金華兵燹

之後教民開墾成膏腴萬頃太祖賜詔褒美致仕後愛

梁溪山水清淑遂卜居膠山埃村里子孫因家焉

張安國定海人少居無錫建文朝官工部郎中致仕歸聞

靖難之變率妻孥自沉於太湖弟安義國子生亦不食

卒定海縣志有傳

陳公實字耕隱嘉定人與姚廣孝善靖難兵起廣孝薦辟

之公實避居無錫終其身

按嘉慶志作陳周蘇州人建文中進士志外云姑蘇志建文時無進士名陳周者查陳氏譜始祖公實與姚少師善徵召不起自嘉定避居無錫其孫周成化辛丑進士見選舉表即陳以忠之祖也足證前志之誤今從之

聶大年字壽卿臨川人以貢授仁和訓導改常州因寓無

錫一目重瞳長身紫髯有清才能詩善書景泰六年徵

詣翰林預纂修之事卒於京師



王懋明字僅初長洲人讀書經目能誦多撰述人稱經笥  
爲學士華察所知僑居無錫與邑人姚咨同客於察時  
目懋明咨及察與施漸爲錫山四友

吳孺子字少君蘭谿人博學善鑒別古書畫彝鼎款識遇  
俗人輒曰我不識字口占詩使人代寫能畫水鳥芙蓉  
蘆藻嘗遊鴈蕩絕食取蘆菹以給遂四十日不返好潔  
見泉水冷然雖秋冬之際便解衣赴濯家旣貧以數緜  
市一大瓢拂拭光采殊自寶惜盜發其篋怒而碎之抱  
持以泣者累日王世貞爲作破瓢道人歌又自謂得劍  
術藏一劍每誡人勿近所至炊一銅竈飯不足則繼以

粥糜日買少生菜別異榦葉爲齏羹語人曰使我不俯  
首向時人者甘於五鼎矣與孫繼皋善故常遊無錫晚  
歲來依遂死其家

薛敷教字以身武進人提學副使應旂孫居邑之五牧萬  
曆十七年進士觀政刑部卽劾都御史吳時來耿令聞  
不當爲執政阻言路罷歸薦起鳳翔教授遷國子助教  
一疏諫三王並封再疏救趙南星被逐謫光州學正歸  
講學東林望重朝野孫案少讀書邑中城東王氏崇禎  
三年進士由刑部郎出守開封見時事不可爲亟告病  
歸鼎革後出家靈巖爲僧自號米堆



王野字太古歙人從祖仲房以詩名野少習爲詩長從其兄賈江淮間因僑居邑鴻山下詩益有名嘗遊金陵有貴人慕其名訪之野蹇驢報謁稱布衣王野投刺竟去戴思謙號雲洲鳳陽人居無錫早歲賣卜於市尋去之京師又自齊魯歷燕代登醫巫閭慨然慕安期羨門嘗在廣甯雪夜遇一道人授以五運六氣十二經絡之祕及證治諸方旣而棲小五湖之石塘山間出爲人治病沈痼立起遂名於時當事多延致之或以事請思謙輒爲掩耳云

李譚號滌菴本姓沈嘉興人具經世大略魯王監國於浙曾與兵事其後遯迹至邑之膠山時閉門慟哭與黃庭善依之以居工詩歌古文卒無子

湯之錡字世調宜興人明季布衣遭世變屏居田野講求聖賢之學嘗來無錫其學宗顧高主靜立極之旨而歸於踐履篤實旣歿諸弟子祀之錫山之麓

金敞字曠明武進人負氣節有經濟才魯王監國嘗官僉事大兵渡錢塘江易服行遯事定歸里與章大士從湯之錡講學無錫悉遵東林舊規敞流離顛踣不忘忠孝疾革時呼弟子取缶吐鮮血盈器曰一腔熱血盡矣遂卒大士字我任敞同邑人



身本字野人中州人初姓謝後忽去謝字兩旁而以身爲  
姓作告廟文詞甚哀其於天文地理律厯算數皆神悟  
默契所製占候測量諸器巧思絕人嘗從金敞遊敞歿  
徒步至關中求李顒序其遺書主邑中楊氏家以畫龍  
自給

國朝

龔廷厯字玉臣武進人自湖干徙居無錫熙春里順治九  
年進士除湖州推官上官有以叛黨陷平人者廷厯不  
可上官怒爭之益力乃罷歸廷厯好讀書手不釋卷與  
邑中秦詔最善

錢陸燦字湘靈常熟人蒙錫籍補諸生爲聽社十七子之  
一踔厲風發才名甚著年四十餘始舉順治十四年鄉  
試以逋糧案誑誤旣而復還授通判職崑山徐乾學修  
禊遂園爲耆年之會陸燦居首年已八十有四

胡獻徵字存仁武陵人以父侍郎統虞蔭入國子監授戶  
部主事遷郎中出爲直隸巡道明於折獄人稱白面包  
公所薦拔守令如彭鵬陸隴其邵嗣堯輩後皆爲名臣  
擢湖廣布政使改江南移疾去官治園亭於惠山之麓  
遂家無錫子其衡字元方舉人官至甘肅巡撫其衡負  
異才故與大將軍年羹堯善年敗下獄卒放還其衡於



世宗時嘗薦漳浦蔡文勤世遠見全祖望墓志

塗騰茂字植卿延慶州人順治中由拔貢生爲西鄉知縣時秦地未平自西安至西鄉道經黑水圩爲明總兵賀珍所據騰茂驅車徑前珍不敢阻至境募士訓練守禦珍遣部將圍西鄉急攻三日夜不能拔會救至騰茂身率壯士開門突出內外夾擊珍敗走西鄉以甯累官鳳陽知府致仕卒於揚州葬無錫之大池子孫因家無錫蔡汝騏字養恒蘇州人父客楚久汝騏間關訪尋父不欲歸則迎母入楚旣復奉父喪還吳屢瀕危險心力並瘁本家洞庭晚徙無錫遂世居之

嵇永仁字匡侯由江甯徙居無錫遂家焉少爲蘇州府學生福建總督范承謨延至幕府康熙十三年耿精忠將煽亂永仁勸承謨早備之乃條上撥餉補兵安插逃弁屯田等議并請提精兵駐上游以應變精忠旣叛幽承謨別室脅永仁降不屈因錮之獄永仁以炭畫壁作詩與承謨遙倡和凡在獄踰三年聞承謨被害遂自經死賜鏹歸葬贈國子監助教永仁能詩古文有抱犢山人集子曾筠見宦望傳

薛景珏字玉佩四川蒼溪人康熙中領鄉試第一歷光山知縣乾隆九年卜居邑之寺頭卒年八十有三著有藏



書閣詩稿子稻孫舉人倜儻好義嘗隻身走數千里送亡友旅櫬還其家詩才婉麗具晚唐人風格孫玉堂見文苑傳

王澍字筠林金壇人康熙四十五年進士仕至吏部員外郎初由翰林編修改官戶科掌印給事中雍正初元詔六科胥隸都察院澍疏言不便自是科臣雖隸都察院得封駁如故尋移銓曹歸悅梁溪山水買屋金匱山旁自號二泉寓客澍善行楷書兼工篆隸喜成就後學邑之工書者華淞王游皆其弟子也

蔣衡字湘帆金壇人恩貢生工古文詞及書法進手書十三經授國子監學正不赴補往來淮揚蘇杭間碑版榜額多出其手卜居無錫子麗官黔西知州孫起元見文苑傳和見藝術傳

在端書字念齋溧陽人尚書蘭枝子蘭枝父文煒官無錫教諭遂家無錫端書乾隆二年進士第三人官編修丁父艱歸遂不出優遊林下二十餘年所著有南屏集

徐德宗字于朝貢生崑山尚書乾學孫壻於秦遂居無錫倜儻負奇以詩雄於時不得志輒壞以歿女夫秦鴻鈞葬之惠山望公塢下從孫鏞原名嵩涉獵經史亦以詩文名以金匱籍中乾隆五十一年舉人謁總督畢沉於



湖北會有兵事主奏記厯官蘄州知州鏜慶子寶善出繼同族後占歙籍以進士官御史性好施賴以舉火者甚眾京師粥廠久廢力復之著有壺園詩鈔漢魏樂府毛秋繩字秦芟陽湖人平生抱匡章之痛棄妻子去田里以布衣倨傲公卿間著書等身而不免蕪雜之病居無錫主華希閔家希閔歿樓遲僧舍以終

江筠字震滄長洲籍徽州人乾隆二十七年舉人幼依外家於無錫爲吳鼐高足弟子博雅好古其學尤長於三禮三傳著有儀禮私記其友戴震爲之序晚年失明以教授自給

俞璉原名璟字介唐海鹽人吏部侍郎兆晟孫兆晟去官後卜居無錫璉幼英敏目十行下稍長詩賦書畫無不入妙而畫尤能入宋元人室高才不遇侘傺矢志以終劉汝器字重彝陽湖人尙書協辦大學士於義曾孫父寅賓舉人家金匱之錦樹里僅一赴南宮試絕意進取授華亭教諭汝器少有至性敦內行工於詩年四十餘始舉順天鄉試偃蹇以歿汝器弟汝暮官翰林編修亦以才著

楊懋珩字桐石江西進士任長洲知縣罷官後僑居無錫十餘年與丁芳洲兄弟及四川諸生張問簪觴詠無虛



日問簪字海客豪放不羈沒於無錫著有海客詩鈔程開泰字韻篁附貢生徽州人歷知分宜德安藍田鎮安等縣嘗捐地十餘畝歸同仁堂著有攬雲詩集

許憲字顯明閩縣人父松佶爲江蘇布政使遂家無錫憲任澄海知縣甫下車卽擒積匪李亞集誅之邑之南河通潮汐田苦斥鹵憲築長堰蓄淡水溉灌民便之升碣石同知解組歸憲工書臨摹不輟年九十一卒從孫鉉字春山以進士官趙州知州時滑縣教匪滋事大兵進勦趙當其衝方旱歉物價騰貴鉉請於例外加一成市直以平民甚德之

劉嗣綰字芙初汝器子少受學於楊芳燦才名甚著嘉慶十三年會試第一授編修官京師引掖寒畯唱酬問字者戶常履滿晚年主講東林造就甚眾著有尙絅堂集趙函字良甫吳江人父基乾隆中官金匱訓導因家焉函少工吟詠從楊芳燦游與芳燦子夔生及徐寶善顧翰顧翹相倡和有同岑五子詩函以名諸生久困場屋家無儋石游公卿間數十年著有飛鴻閣詩詞菊潛庵牘稿等集



自二氏之教行其間不乏修真見性之徒以道行聞於世而世所傳尸解焚化雖涉怪誕亦偶見於紀載其他道流縉侶從士大夫遊往往好為吟詠篇什流傳者有之至若時際滄桑逃名方外此又當分別觀之者矣志

釋道

釋道第三十三

梁

釋法超邑孟氏子年十一出家住靈根寺修習經論雅有深思武帝敕為都邑僧正命徧尋戒檢網羅眾部撰出要律儀普通六年講律平等殿帝臨坐聽受三旬而竟



七年冬卒勅有司葬於鍾山開善寺

陳

道慶姓戴氏其先本廣陵後渡江家無錫年十一出家善談說時目慶江河在口陳亡東歸無錫居鳳光寺風神蕭散毫翰奔涌琴書清妙篤於交遊唐武德九年卒穿壙日有羣鶴自天而下哀鳴久之

唐

若冰不知其所自來寓惠山之普利院惠山泉本出洞中歲久而湮冰披荆榛劇巖谷乃求得之古洞既啟新泉遂注故後世稱惠山泉必本於冰冰能詩工書法

常俊清河張氏子住鳳光寺禪宗內蘊法印心契會昌元年示寂葬無錫縣太平鄉村東一里官河西門人文則元通伯昌等刊磚爲誌

見全唐文

宋

宗本邑管氏子性質直少緣飾年十九師事蘇州承天永安道昇禪師弊衣垢面操井臼之役十年薙髮受具服勤三年乃辭昇遊方至池州謁義懷禪師言下契悟使主瑞光集眾擊鼓鼓輒墮圓轉震響眾以爲法雷震地之祥自是法席大盛神宗闕相國寺召本主惠林對延和殿有司使習儀而後入既見賜坐盤足趺侍衛皆



驚變色帝問受業何寺對曰承天永安帝更喜其直哲  
宗卽位加號圓照禪師元祐中乞歸元符二年入滅塢  
靈巖山

元

慧鑑字仲明號湛然靜者俗姓徐氏世居錢塘江上至正  
末浙西兵起削髮爲僧住惠山寺善畫多散落莫止藏  
其江山雪霽圖

明

至道字物外臨海人卓錫邑之嵩山寺少師姚廣孝嘗師  
之歸者日至遂大建幢刹爲嵩中興祖

普眞字性海延陵人有高識住惠山寺寺災眞重建之嘗  
種茶惠山之麓晚又創聽松菴於寺左而居之歿遂葬  
於菴後王達銘其塋眞與至道皆能詩眞弟子韶石深  
於禪悟亦能詩

道瑒字楚石能詩住惠山寺後薦爲南京僧錄司左覺  
慧照字本明邑孟氏子出家惠山寺善書有詩名與倪瓚  
高啟遊詩成雖夜必造而商焉

信受字西傳姓陳氏嘉定人博學有文幼聽法南翔寺有  
悟因出家後住翠微寺著韻會增註通鑑集覽正誤又  
覺性者亦陳氏子出家惠山寺通儒書多知山中故實



嘗著惠山志

法泉字雪山吳人居華藏寺與松巢一雨並以詩名有雪山集王穉登序之

圓顯邑陳氏子幼不茹葷不踐生草出家於知微山房戒行精勤博通梵典不出山門五十年老著惠山記十卷希復字同石吳江人住東郭綠蘿菴中工詩善畫俞憲王問俱稱賞之

真緣邑梁氏子出家參方十六年得悟性宗萬曆中之四明禮育王佛舍利塏光中感佛現身乃曰真緣何德感此瑞相遂誓焚身以報佛恩頃之烈焰自發身如黃金頂間復現一佛長二尺許觀者萬人塏於鄧峯之巔

法藏號漢月邑蘇氏子年十一入寺禮佛方投地心若開悟十五出家既而研窮內外典籍過海虞三峯喜其幽寂居焉室不置榻懸板於側困則倚之適窗外植援屈竹有聲忽得心空後閉關參臨濟元要至疽發於背而不覺久之忽推窗見黃梅墮地乃契旨聞天童悟禪師出世金粟往從之即日請爲第一座未幾欲辭去天童乃手書臨濟源流并信拂授之初開三峯法席厯主大刹後歸鄧尉聖恩一日上堂辭眾示寂塏於聖恩寺之右入塏之夕有白光如虹貫天



祖福字谷泉秀水龍淵寺僧後居惠山以老能詩著有谷泉集

洪恩字雪浪能詩天啟間開講於惠山不二門過草菴樂之爲顏曰忍草由是菴名始著時菴僧有德洪者亦能

詩

雪徑明宗室朱翊鏞祝髮爲僧工詩尤善鍾王法

宏證號大樹邑朱氏子出家依三峯禪師苦志力參一日目前壁立白光照耀忽如胸背迸裂洞見身後諸物人因名爲破背比丘後侍三峯七晝夜目不交睫忽憶世尊不說說迦葉不聞聞而得開悟歷主潤州甘露石渚

淨業玉峯清涼晚居邑之華藏示寂塏於三峯

宏璽號剖石邑鄭氏子謁三峯藏禪師依止二年一日舉扇揮面有省旣而元日與一老宿相見忽明大法又八年盡徹奧義乃付源流開法聖恩住山三十五年示寂塏於本山華嚴壇後

宏儲字繼起號退翁崇川李氏子母夢異僧授金環而生年二十五慨然曰丈夫有一事不知猶以爲恥況如來大法乎遂見三峯藏禪師於邑之錦樹菴尋從入鄧尉剎染遂獲印記初住祥符歷主能仁國清興化靈石天甯靈巖諸剎前後往來無錫說法時最多其弟子觀英



居溟輩皆久闡教於邑中後退老靈巖示寂火後啟龕忽大聲如雷放異光燭草樹如晝

讀徹字蒼雪雲南人居吳之中峯以講華嚴疏鈔寓北郭蓬萊閣最久讀徹詩有一夜花開湖上路半春家在雪中山之句王文簡士禎極賞之許為當日詩僧第一沈文愨德潛選入明詩別裁豈遺民而逃於禪者耶

本仁字明潔姓李氏邑故提學副使應祥之子初名仍枝為諸生甲申之變去而歸禪始居邑西華嚴山去其先人之墓五里而居既而之夫椒將依祥符宏儲不遇復歸華嚴而卒

此本舊志邑中無華嚴山或是華藏之誤

遠俊字介石邑故國子生王永嘉也生有至性而躁急不能諧俗鼎革時避地鄉居遂不入城邑去依儲禪師於靈巖得源流衣拂之付厯主瑞巖徑山未嘗為眾說法晚居邑開化之洞菴又靈巖弟子志元字古疑亦邑人

國朝

觀英號毅菴合肥孫氏子年二十出家參瑞光徹禪師有省已忽自疑曰使禪只如此亦何以參為去謁天童參弁山皆不契復謁靈巖儲禪師始大悟後付源流令開法國清至則鍵關六年謝絕酬應衲子苦其嚴冷儲獨重之嘗曰天下會第一句者三人老僧與具兄及毅子



耳具兄徑山禮禪師也。歷主觀史院光嚴祥符。晚乃退居邑雙河之柏成菴。

居溟字去息蘇州徐氏子。出家鄧尉。後參靈巖儲禪師。遂受印記。尋主祥符及邑之摩竭。保安繼靈巖祖席者二年。復退居無錫北禪寺之旁舍。嘗和宋栢堂禪師山居詩四十首。風格特妙。示寂後塏於開原之青山。

方晟字雍篔。通州孫氏子。少爲諸生。嘗受業馬忠肅世奇之門。中年歸釋氏。得法於靈巖儲禪師。主無錫保安寺。旣而退隱吳門寶華之南麓。作宗門崇行錄。晚歸泰伯鄉之福慧菴。示寂。

圓通自號杲道人。順治初。卓錫福慧菴。相傳爲明季進士。文章詩畫無不精。菴中有手寫蓮華經楞嚴經。

南潛字月函。湖州董氏子。初以儒服參靈巖。有所觸發。不竟學而去。後三年。請爲弟子。旣得。付屬主堯峯寶雲院。後主無錫保安。博綜典籍。有奇才。彙纂宗門諸書甚富。超杲字玠。水邑黃氏子。年十三出家。得法於龍池。旣而遊京師。

世祖時嘗

賜紫衣。歷主慈雲廣濟。修笑巖祖塏。南歸。修建惠山嵩山。二寺。錫山龍光塏。皆久圯。之後一時鼎新。超杲性孝前。



後遭父母喪皆克盡志後遊楚還至儀真示寂千佛寺  
秦松齡銘其塋弟子性乾祝髮橫山雪浪菴繼席嵩山  
竟所未竟弟子覺紳嘗請方策大藏經供惠山不二門  
蜀喬康熙初卓錫斗山有詩一卷秦松齡黃雲為之序又  
然明字昭雯富於詩著有業桂齋集

濟鎡字慧基蜀人受法於三峯證禪師初住靜九龍第五  
峯下後主邑東梅里祇陀寺

寂琇字乃奇漢川人能詩康熙間秦叔銘延之住惠山一  
梅亭更名曰楚禪菴釋居溟為之書額又德新號懶牧  
宋村朱氏子亦能詩兼善書法

圓顯字文晦得法於靈巖居惠山忍草菴工詩善書著有  
樗巢吟稿忍草菴乘略

道乳字密龕本邑諸生棄去為僧得法槩公性孤潔間為  
詩不輕示人同時元徹字沂月善琴詩亦清逸

超拳字施山邑周氏子受石峯記前後結菴鄧尉之菖蒲  
潭與諸名士結寒香社菴有古梅甚高超拳架木為巢  
與客對奕其上遊人探梅詣其處每於花下丁丁聞落  
子聲著有梧影山房詩十卷又超鏡字晚堂龍池素巖  
淵和尚法嗣住持邑西南許舍里之古洞菴亦工詩  
處洪字迂公太倉江氏子出家依去息溟禪師居開法保



安寺主席靈巖退居邑之寶華菴能詩著有山居雜詠  
同時宏倫字敘彝亦能詩

明際字滄洲住城南之吉雲菴與杜詔朱克敏輩唱和著  
有吉雲遺稿

元文字株雪石門沈氏子為劍安果禪師法嗣能詩康熙  
中住持惠山之壽明菴

則遠字研樵一字聲倍能詩著有冷齋集超揆為之序超  
揆字輪菴號寒溪道人

明瑜字昫熙板村蔡氏子祝髮保安寺康熙中主席靈巖  
著有隨雲草又明遠字惟善文溪菴僧亦能詩

妙復字天鈞住錫山石林菴與杜詔榮漣結詩社號九峯

三逸妙復詩清真閒淡脫落塵滓亦詩中之逸品也朱  
克敏輯其遺稿時大悲菴僧繼遠亦好為詩與妙復還

往唱和

成瑩少祝髮惠山寺雍正間入都受戒律於法源寺

賜紫衣於圓明園內參禪閱數年返初地

高宗南巡

賜石刻心經三希堂法帖貯於竹籬山房之寶墨閣

昭吉字聖宣邑趙氏子祝髮崇安寺普賢北院嘗遊普陀

九華五臺峨嵋歸作名山紀遊



明智字聖能短而修髯嚴戒行乾隆五年住崇安寺開堂接眾自明智始十八年募建天王殿二十一年六月方盛暑徧詣諸檀越告別果以七月二十七日焚香沐浴而逝其弟子實樸字剖成嗣法爲住持募建鐘樓禪堂曇花蘭若

清觀字悅可住北禪寺樸率寡言梵誦之外常竟日趺坐而喜以濟人利物爲事遇窶人輒爲丐貸於巨室與僧朗乾同薙染朗乾移主蘇郡之佛花菴而清觀終身不離初地其後有廣衲者持戒律甚嚴居大悲樓廿年足不下樓不見一客云

際慧字靜菴新安程氏子年十三出家蘇州法華寺受具戒於雲林巨師復從石杉省老人講天台教觀直契微旨後住持邑之南禪寺著禪宗心印楊潮觀爲之序達乘字志清披薙崇安寺文昌宮誠樸甯靜能書通曉文義主席蘇州靈巖山崇報寺寺無鐘樓募建焉逾年歸示寂之頃崇報鐘樓頂有花葉怒生烟氣翳然一發頓痿若感召云

申和尚住持準提閣能書好靜持戒最嚴與諸生周暲相友善暲晚年貧甚申和尚留宿菴中十餘年嘗終日相對無言見者歎爲神交



右釋

宋

盧至柔字必强茅山道士初居洞虛宮以符水濟人病可治者與之水卽不可治必欲得水亦不拒及歸發水輒上激如矢迸流於地終不得飲久而思晦迹行至粲山有鹿騰出曰生氣在是乃結菴居焉大觀初元符宮籙劉混康以至柔行業聞於朝賜名其居曰明陽政和中有詔徵之至則先三日逝矣

呂雲字山友幼爲儒爲文甚敏一夕得異夢覺有所悟遂去家如京師道籙劉某方被徽宗眷遇補雲金壇郎非其志也去入太行山遇至人授以元旨辟穀窮谷中茹草木而神采充潤紹興中三下詔徵入對太乙宮自是時入禁中論講莊老乾道中自草遺表晏坐而化

尤道元字浩光表族父也性孤介志慕沖曠先是方茂山登仙觀有錢道士夏月汲水王八百丹井得冰大如壁取食之遂發狂不復粒食周遊名山不知所終道元初從錢遊食少冰亦不食者數年一日渴取水引飲自是復食顏如渥丹雙瞳凝碧晏坐一室凝塵滿几乾道間無病而化

徐道明邑石幢儒家子家貧母武進王氏因度爲天慶觀



道士德祐乙亥城破敵帥坐觀門謂道明日亟降吾活爾觀中人道明曰吾知有宋而已不知其他遂死之帥屠其觀少長數百人無乞哀求活者

元

倪文光字昭奎瓚從兄生時夜有光出屋上稍長學道儒釋輿地象胥之說無不精究去爲黃冠師作元文館於弓河之上以祠老子有薦之者署州道判會蝗文光祝之悉入太湖於是州上其事賜號元素神應崇道法師又賜元中文節貞白真人嘗築清微觀於惠山重九日登山絕頂下睨五湖揮手謝別越明日卒

明

尹蓬頭宏治中嘗遊金陵毘陵之間攜宋時度牒自言理宗時人尹從龍也至無錫止秦勵家或毒暑暴日中或嚴冬擁雪臥身腐穢多蟣蝨勵與同寢處三年後去不知所終

周松石字碧崖宏治中洞虛宮道士嘗以夏旱禱雨卽應邑人莫息爲記其事喜爲詩有鳴籟集與同邑顧廷鈺戴文澤許某唐勉之談大猷厲某沈廷用張衍之孫時用爲碧山吟社十丙會蓋十人皆生同景泰丙子聯爲詩社嘉興屠尙書勛有記



錢月齡字鶴山邑人嘉靖時洞虛宮道士與王問華察先後唱和著有丹邱漫稿詩見朱彝尊明詩綜

國朝

呂榭字雲隱父貞九明友倉諸生鼎革後棄家為道士榭隨父訪道終南武當金陵從崑陽王律師受法晚居蕩口正心道院每以青律教人曰知道不知律是名空悟知律不知道是名空修著有心印經注復元山房詩華玉瀆為之傳

陳煥章字倬雲梅里泰伯廟道士道行修潔禱雨輒應間為人祛邪治病無不驗者徒孫曹峻字維岳本望亭儒家子嘗請帑修泰伯廟及梓其祖得忍所著禹貢正義三卷行世

樊太復字初陽元升壇道士嘗與王雲錦及南禪僧迅帆倡和吳門陳必大為之圖著有初陽詩稿時又有秦太照呂太晉亦以道士有詩名

榮漣字三華少孤多疾母命入明陽觀為道士為人簡直善畫亦能詩徧遊名山水所至以詩筒畫笥自隨事母孝在外得珍玩良藥悉藏以奉母母歿廬墓三年不復出邑士大夫共往迎漣築室錫山之巔以居之漣鑿池其中繞麓植梅花名所居亭曰香雪其後有朱道士者



善畫山水亦居於是秦瀛有雪後登錫山飲朱道士山

房詩

陳韶字舜音梅里泰伯廟道士能詩善吹笛時以長笛仙目之又錢鈞字引年亦泰伯廟道士年六十遊武當著有紀行草

李谷賓不知何許人嘗寓崇安寺與一老僧善僧患痢已不起谷賓煎松蘿茶飲之遽愈自此常爲人治病凡從之學養生術者多老壽居寺中久將去留大竹一截謂寺僧曰吾去必有人來訪可以此示之旣去果有人至寺僧以告示以所留竹剖之得畫一軸谷賓小影也其人捧持畫軸涕泣而去谷賓不知所終

葉嗣昌字丹山世居邑之石幢出家洞虛宮爲道士性澄淡氣清色夷善符籙遇歲旱有司延之設壇祈禱無不應以是名聞四方後有方楷孫鳳梧並能傳其法

侯淦字青溪出家城東之報恩道院能爲詩五言澄澹學韋左司又喜藏書丹黃甲乙籤帙恒滿與程楚芳蔣同元善楚芳山陽人依其外舅諸洛居無錫同元蔣衡孫三人皆早歿

華宗彝號汝軒出家梅里泰伯廟通元理乾隆二十一年隨張真人至京都和碩履親王給透參同契額又贈十



一曜神像爲鎮山寶後嗣錢燦錢鎬皆有道行燦兼善書畫

華乾字雲峯陳敬字亦華俱泰伯廟西院道士精祕典祈雨輒應嘉慶二十三年修泰伯墓又捐田六畝爲墓祭費重刻梅里志若干卷

華滋泉字雪梅出家祠山廟善符籙嘉慶十九年大旱延請祈禱得雨年過七旬體貌充實不異少壯云

胡倚字卓峯洞虛宮道士祈禱輒應歲癸未大水以錢助賑不署名晚通易理年過七十忽不食飲茶數日而卒著有止樓集

嚴仲均字星舟洞虛宮道士長身鶴立端謹寡言精符籙其卒也先知時日人謂靜養所致

右道



無錫金匱縣志卷二十九終

無錫金匱縣志卷三十



風俗

延陵遺教其君子讀書好禮其小人畏罪重法沿流討源厥風懋焉迨至風俗與世移易佻達徧於子衿訟師起於飲食蓋禮讓之俗微矣昔南陽好賈而召父富以本業潁川好爭而黃韓化以篤厚摩揉遷革是在有司况逢

聖世累洽重熙沐日浴月長吏所以化導斯民使日鼙鼓軒舞於不自知者宜何如也志風俗第三十四  
荆蠻之先斷髮文身至秦伯來奔其民從之遂以立國厥



後延陵季子閱覽博物慕義無窮去千乘而不顧吳都賦所云端委之所彰高節之所興者迨吳越相攻其民好勇輕死易發是時闔閭已遷姑蘇而句吳之禮俗衰矣至漢時高祖王兄子濞於吳招致天下士枚乘鄒陽之徒並尚文辭其失巧而少信吳俗一變自是之後雖時代屢更升降不一至於勇或輕發文或寡信大抵不離乎二者而已宋時邑多儒者至明之季世東林諸君子崇正學主持名教遂成風會當時聲氣大廣響從景附或者病之然甲乙之際布衣韋帶多能忼慨赴義亦道南之遺教也

男子不行冠禮見於舊志婚姻之家必量其貧富而後合嫁之少女冠曰花籠其上雜綵爲人物蒙以紅帕而曰是神能傷人入門女媒氏亟手探而壞之則吉交拜後行合巹禮三日行廟見禮彌月婿婦皆往拜父母謂之回門無知小民有新喪娶婦者謂之拔親又父母疾不行婚禮肩輿昇女而歸謂之衝喜二者非禮之甚喪不師古而繁於俗禮尤重僧道禮懺誦經七虞內無虛日一殯之費或破中人數家之產親死久不葬多爲風水所惑大夫士廟制久廢節日忌日祭於祠清明十月朔祭於墓庶人之家亦如之疾病先鬼神而後醫藥凡巫



祝所言莫敢不信其士之桀黠者相與舞刀筆破律令表裏胥役其爲構煽其次好談新聞造作謠詠或騰匿名書夜揭坊市旦相傳述至於袒跣呼盧雖優隸輿臺不擇其人有司奉公令間捕一二小民懲之而其淵藪不能問也邑中巨族向以詩書世其家而冶遊之習結隊成羣近日尤甚農民勤力作無不毛之土故田之貴數倍於前而佃不輸租每爲業戶之累市井之豪羣萃州處以飲博相徵逐遇事則逞其拳勇呼噏聚散弱肉強食爲閭閻患家奴竈養去留無時有祖孫相繼爲世僕主人稍失勢輒跳梁甚有違犯告訐其主者

此風蓋在明季

邑中凡遇神誕不惜糜費財力諸廟神來賀爲本廟神設宴昇神出謝事近於戲至有左道惑衆如前志所云無爲長生諸教近已衰斂杜漸防微良有司責也

邑地氣本薄雖男勤耕女勤織鮮有積聚故素封之家遇歉歲則貧至於故家大族支派繁衍苑枯不同義莊義塾前志已有之不久而廢近鷺湖華氏創行之踵者遂十數家敦睦之風庶幾近古同善之會所在多有比復有同仁普濟育嬰卹嫠之設掩骼埋胔各鄉義塚數十處斯皆邑中善舉惟哀多益寡施濟良難有心者不能無遠慮耳



兩邑二十二鄉風氣各殊天授興寧勤於稼穡薄於飲食  
婦人執女紅嗇而近陋故凶歲寡流亡之患膠山上福  
萬安類之招義尤樸青城類之興道布政神護富安西  
鄙之民頗驚訐而好訟開原揚名水國習漁有魚蝦之  
利富者兼事商販衣食差足新安素輕佻農隙織蓆爲  
業開化稟岡巒之氣性好鬪狠巨室自尊以凌貧弱秦  
伯垂慶延祥梅里向稱醇謹有先民之遺近亦稍侈宅  
仁懷仁去邑遠其豪多役屬居人而武斷其鄉景雲襍  
數處以成俗爲農爲圃爲陶以至歌舞博塞袖手而嬉  
各附所近此大略也

歲元日五鼓長幼咸盥漱拜家祠祖先訖然後互相拜賀  
市闔戶凡三日罷炊而食隔歲之餘又禁不得灑掃取  
蓄藏也他邑祝壽例以其人生日邑故事計一歲中合  
若干家列其目於歲首畢賀云崇安寺市臚列兒童玩  
具自元日至望日而止上元夜斷木爲薪如其日之數  
架而然之於門佐以爆竹名曰火爐燈市爲魚龍寶蓋  
之屬鳴鉦疊鼓衆舁以行婦女聯袂而出名曰走三橋  
家家作粉丸食之名曰團圓二月北塘舊傳香燈之會  
蓋吳人進香武當者期會於此至之夕聯索於檣縱橫  
上下懸燈至不可數今已廢寒食簪麥清明插柳士女



出行郊外爲踏青上巳戴薺花謂能已睡三月望前後鄉人各執香沿途禮拜上三茅峯曰拜香會二十八日齋辦香走東嶽廟者數縣畢至村姬市媪扶攜而行遂止宿廟中名曰宿夜數日間寺塘涇爲之壅塞立夏合七家茶米食之云不病暑四月八日浴佛作會謂之傳經梅里鄉祇陀寺尤甚午日比戶裹角黍屑蒲根雄黃和酒飲之堂戶粘朱符蕪蓬艾以驅毒物婦女翦綵爲人大如荳謂之健人又刻繭虎以細爲能襍符艾而簪之是月之初卽傾城出觀競渡龍舟午集迎潮館下自月朔至晦戶懸一燈相傳爲張睢陽而設非也當明兵臨縣將屠城賴義士張翼以全翼以四月晦卒民德之以是報焉今稍廢爲睢陽則於七月朔至晦日里巷懸燈皆遍夏至炊麥荳作糜以食六月十九爲觀音會立秋日食瓜或以赤荳七顆和水吞之以防瘧疾七夕乞巧女子以雜花漬水露置庭中旦則取以醜面謂能好顏色十五日各寺觀舉盂蘭會比戶以楮幣薦亡三十日戶設香燈於地謂地藏燈中秋以月餅相餉夜結高臺置香盈斗而蕪之名燒斗香是夕皆置酒肴瓜菓二十四日以新秣米爲糍餌祀竈九日則登高瞰重陽糕九品羹十月十三日進香保安寺穢跡大士前冬至賀



節亞於歲首臘月八日食粥以菜菔襍煮之二十四日  
掃屋塵是夕然火爐作瑪瑙糰祀竈農家於田間然長  
炬名照田蠶二十五日作紅飯以祀牀然蒼朮以辟疫  
俗本工為門神至是盡易新者除夕復然火爐少者揖  
長者為辭歲定昏後掃除中庭以白堊畫地作弓矢懸  
先像於堂中歲乃告畢事

占候之法立春日宜晴暖寒則主水元旦晨占東南風大  
稔東風次之東北又次之西則歉七日為人日晴則少  
疾疫八日為穀日晴則穀不糝上元夜分月影卜水旱  
二月八日祠山神誕相傳神請客送客必有釀寒風雨

十二日為花朝晴則百菓熟上巳日聽蛙聲占水旱午前

鳴高田熟午  
後鳴低田熟詩云田家無五行水旱卜蛙聲指是日也

四月十二夜雨傷小麥芒種逢壬為梅夏至次日為時  
五月忌甲申乙酉日雨雨則大水二十日為分龍次日  
雨主豐稔立秋日忌雷又處暑日更忌為風潮之驗秋  
後虹見為天收雖稔亦稍減八月朔喜雨雨則有秋九  
月朔喜晴晴則燥穫中秋夕晴雨占次年元宵良驗霜  
降日有霜則穀貴小雪日有雪則穀賤九月十三日為  
小重陽喜晴十一月十七日早起占風南風米貴北風  
米賤冬至後逢三戌為臘喜雪除夕為粉坎十二如燈



檠盞按方位置飯釜之面飯熟時揭釜蓋看坎水各分數以徵來歲逐月雨水多寡奇驗除夕所事皆畢後沃水於釜以木瓢旋之視瓢柄所指潛走其方聽人語謂之響卜又俗諺云歲朝烏漉禿高低田稻一時熟又云百年難遇歲朝春又春寒多雨水又黃梅寒并底乾又二十分龍廿一雨又小暑一聲雷黃梅倒轉來又處暑一聲雷糝穀兩三堆又秋李鹿損萬斛又九月十三晴釘鞋掛斷繩又若要麥見三白又臘雪瑞春雪災老農以此驗天時十不爽一

識小錄云方康熙時冠履猶尚古樸常服多用布冬月衣裳者百中二三夏月長衫多泉葛間用黃草縑今則

以布為恥綾緞綢紗爭為新色新樣北郭尤甚間有老成不改布素者則指目訕笑之冬月富者服狐裘狍獬孫之屬服貂者亦間有之若羊裘則為貧者之服矣馬褂昔惟營兵衣之當康熙之末有富家子為此服者眾以為怪甚有為俚句嘲之者至雍正間服者漸眾今則無人不服鄉僻亦效之游行街市應接賓客不煩更衣習俗移人方領矩步之風不可復見矣遭喪之服昔期年以內袍套俱用黑布下不緝小祥後始用黑春布為套大祥後始俱用黑近則七外即衣黑無衣白者推所由來蓋出仕者在任聞訃或有事見上官色忌白故做墨縗之制後在籍者效之庶見素衣惟在村農牧豎難望諸衣冠之族矣可歎哉昔童子十歲以上猶簪髮為髻裁綢布兩布前後合縫為帽露其頂蓋古未冠時飾如此至十三四始去頂髮垂辮從時服焉今則甫三四齡遠辮髮戴冠與成人無別或加金銀水晶頂著補服以為華飾則褻名器之尤者也



善舉

周禮任恤著於六行然其時上有授田之制下有收族之法而老幼貧窮疾疫者又有保息之政以通之民之不得其生者蓋寡後世或貧無立錫而宗法又壞甚至父子異財產昆弟不通有無降而至于宗族鄉黨之間其情意衰薄固無譏矣是以民生日蹙而相救相調之義爲尤急也夫勿以善小而不爲况足以濟羣生垂久遠者乎志善舉第三十五

普濟堂無錫舊有二一在西溪一在陸龍基皆富安鄉金匱亦有二在懷仁鄉上下扇乾隆五十八年邑人過鳴



岡祝安等於北門外慈雲寺後別建一所兩邑共之咸

豐十年毀同治初以城內福緣庵改設堂舊名養老雍正四年易今名

育嬰堂在金匱城隍廟西康熙中知縣吳興祚與邑人秦

松期倡為之尋廢乾隆初金匱知縣王允謙募王邦采

秦圭田等捐建堂廡無錫知縣吳翼祖撥公田為乳養

之費每歲義租項下無錫給錢六百千金匱給米三十六石麥十六石五斗管嬰孩義冢

四處無錫應宿墩後金匱城隍廟後及同仁堂後堂旁咸豐十年堂毀同治六

年脩建歸同仁堂理其事

同仁堂在金匱城隍廟東嘉慶二年邑人秦震鈞倡建施

藥施棺施棉胎管棲流所三八兒巷糖棧街館驛前各一所所以居流民疾病之無

歸義冢九五里街有二萬壽庵後庵旁各一南斗星君廟後保安寺旁東亭鎮嚴家橋冷瀆橋各一

咸豐十年堂毀過半同治六年稍脩建焉

案咸豐十年城陷死難者無算聚而葬於錫山之麓者有三在寶善橋東者有二曰殉難義冢光緒六年無錫知縣裴大中金匱知縣倪咸生倡捐築牆立碑焉相傳元時強以德買璨山地四百畝為義冢今萬安鄉有義冢在十一都一圖其他有附見義莊者

恒善堂在崇安寺東道光四年蘇人許永祥倡建其初祇

郵貧瘞後邑人寶承焯等添設保墓及遞解犯人船咸

豐十年毀同治初趙彭淵秦臻趙榮募捐重建定貧瘞

額三百六十口正副各半每正額月給錢四百副半之

遞解船四隻月給錢七十二千不準封踏他船路斃之



案由堂驗報以免藉尸圖詐歲暮施米施棉胎惟保墓  
事經亂未辦

集仁局在城內西北隅道光間邑人余治募捐創設黃瀛  
伯捐屋爲之內設義學冬發棉胎設粥廠恤嫠有米每  
口月給五升製棺以待貧者與之而收其券無力償者  
聽歲終出券焚之名曰代貫又有善材局在圓通東院  
救生局在吳塘門咸豐五年邑人葛瑗等募捐創設俾太  
湖漁船以拯溺者拯一人給錢四千已斃者減其數

保嬰局在陡門秦巷咸豐九年邑人倪景堯李廷發捐建  
同治初景堯子顯祖廷發子金鏞又共捐田百畝以成  
之凡產婦極貧不能留養嬰孩者由鄰里報局驗實酌  
給錢米衣物之屬

保墓局在惠山忠節祠光緒五年邑人鄒仁溥倡捐及沈  
承祖等集資創設以山民盜賣墓地無主者輒罹其害  
乃設此局逐段繪圖造冊以時稽察

### 右善堂各局

明時有華氏義莊華雲建吳氏義莊吳情建皆置田贍族  
涇皋顧氏蠲公田租千餘石設倉祖祠旁贍族之餘兼  
以濟貧助役今並廢

華氏義莊在蕩口鎮乾隆十年華進思捐田一千三百畝



汪由敦爲之記進思子公弼建莊舍道光間曾孫文標等續捐田二百九十畝族墓八畝

過氏義莊在懷仁鄉八字橋乾隆十九年過廷棟承其祖父志捐田千畝

錢氏義莊在南延鄉嘯傲涇乾隆二十八年錢瀛士繼妻楊氏及子婦周氏建捐田三百四十畝司事錢宗武及子學文續置田二百畝嘉慶中瀛士孫煒燦又捐書塾田七十畝祭田二百八十畝

秦氏義莊在城中第六箭河乾隆四十五年秦春田及族人鑽泰鈞等捐田五百餘畝嘉慶初春田子震鈞創建

莊舍續捐田四百餘畝共一千畝

孫氏義莊在石塘灣乾隆六十年孫文偉及族孫璽等捐

田二百餘畝建倉一所長洲陳鶴爲之記

鄒氏義莊在北門外釘尖嘉慶六年鄒容成妻吳氏建捐

田二百畝

安氏義莊在安鎮嘉慶八年安汝諧建并市房一所田二百畝越二十年盈千畝

周氏義莊在懷仁鄉南橋嘉慶九年周憲武建捐田一千九十八畝義冢一所道光初子安基始報部

陳氏義莊在芙蓉塘橋嘉慶十三年陳寶輪妻顧氏建捐



田九百畝

蔡氏義莊在北門外嘉慶十五年蔡承烈承父國柱志建  
捐田千畝秦瀛爲之記

嚴氏義莊在懷仁鄉寨門嘉慶十六年嚴昭建捐田五百  
畝又集捐田百畝

袁氏義莊在城中中市橋上塘嘉慶十八年袁均捐田千  
畝子士鈺成之

侯氏義莊在城中第八箭河嘉慶二十三年侯鈺建捐田  
三百畝族人鳳藻捐田一百四十畝道光中鳳藻子咸  
及族人昕之翰等續捐田一百八十六畝桐及之翰子  
守廉捐錢六百九十千

錢氏義莊在北延鄉蠡埭錢振鐸建捐田三百畝道光六  
年子雲龍成之

余氏義莊在城中真應道院巷余達海建捐田三百九十  
四畝房屋二所道光八年子大貞成之

薛氏義莊在禮社道光九年薛雲從等承父景達志建捐  
田一千十五畝

趙氏義莊在鷺子岸道光九年趙豫建捐田二百畝又趙  
恒置祭田百畝十九年恒子鳴玉豫子元鳳捐義冢二  
畝



顧氏義莊在聖瀆顧樹本捐田四百二十六畝子觀光等  
於道光十二年建族人廷樑豐等又集捐田六十畝

須氏義莊在懷仁鄉黃莊道光十三年須宗周建捐田千  
畝

范氏義莊在懷仁鄉興塘道光十三年節婦范過氏建義  
祭田四百九十畝

楊氏義莊在江溪橋道光十四年楊恕建捐田千畝子錦  
榮殿英續置田千畝

周氏義莊在泰伯鄉香山道光十四年周瑞清建捐田七  
百畝

華氏義莊在城中道長巷道光十四年華起莘建捐義祭  
田三百二十畝

丁氏義莊在張涇橋道光十四年丁雲錦建捐田千畝  
鄒氏分支義莊在嘯傲涇積五世捐田二百畝卽祖祠爲

莊道光十五年建  
許氏義莊在北延鄉嵩山道光十六年節婦許蔡氏建捐  
田四百三十畝

竇氏義祭田一百畝道光十六年竇廷楸等捐置  
馬氏義莊在萬安鄉仁里橋道光十七年馬杲妻夏氏鳳

鳴妻孫氏承夫志建捐義祭田三百畝



喬氏義莊在懷甯鄉喬巷道光十八年喬榮春建捐田五百四十畝

浦氏義莊在北延鄉安基里道光十九年浦汝霖妻呂氏承翁曰璞遺命建捐田千畝

胡氏義莊在天授鄉村前胡際昌捐田創建子椿柏於道光十九年擴成之共田六百六十畝

浦氏分支義莊在北延鄉厚橋道光二十年浦燮堂朝鐘等集捐義祭田二百四十畝

華氏永喜支義莊在蕩口鎮西閣上道光間華汾春坊廷標等集捐田五百畝

張氏義莊在北門外黃泥橋道光二十三年張耀堃承父榮元志建捐田一千一百畝莊基一所

張氏義莊在西門外丁埜裡道光二十三年張耀墀建捐田一千畝莊基一所

施氏義莊在北門外黃泥橋道光二十六年施會培建捐田三百畝

王氏義莊在北門外布行衙道光三十年王潤芳滋芳承父錦及已故兄弟沐芳漱芳志建潤芳捐田四十畝滋芳四百五畝沐芳二十畝漱芳四百五畝

江氏義莊在南門外談渡橋道光間江樹德樹勳承父秉



禮志捐田四百畝

王氏義莊在南門外黃泥埭咸豐六年王耀堂同從子世

鈺世釗承父洪泰志捐田三百畝

蔡氏義莊在北延鄉西倉鎮康熙間蔡鶴齡嘗置公田四百餘畝尋廢同治五年鶴齡元孫錫蕃妻華氏及族孫承恩妻華氏族孫福蔭承先志創建共捐田四百五十畝族人昇恒捐田二十餘畝又廷桂妻畢氏等捐書塾田四十餘畝光緒二年報部  
華氏義莊在北延鄉東浜同治十二年華衮建捐田五百十六畝

周氏義莊在懷仁鄉同治十二年周文江與妻父柳廷烈

合捐田一百一十二畝

倪氏義莊在景雲鄉坊前同治十二年倪陳氏承翁遺命

建捐田四百七十三畝

華氏三省支義莊在蕩口鎮許家橋光緒元年華存寬存

吉承父清蓮及兄存恭志建捐田千畝棧房一所

王武愍公祠義祭田三百畝市房三所光緒元年王庭楨

捐置

楊氏義莊在南延鄉雙板橋光緒二年節婦楊陸氏建捐

田二百二十畝



滕氏義莊在南延鄉光緒二年滕廷鍾及弟應銓景福從

子同甫等承父達志捐田三百十六畝莊基一所

滕氏義莊在謝埭橋光緒二年滕鑫桂鍾英及從子文清

錦椿等承祖父德源志捐田六百五十八畝莊基一所

顧氏義莊在城南新開河顧鴻達同弟汾灝合捐田八百

畝子璣從子瑤球等於光緒四年建莊基一所

### 右義莊

光緒五年以豫省奇荒邑人多勸捐助賑嗣奉撫院吳札勸捐出力之人未經得獎者先將姓名附入志乘俟通志開局再歸總纂核定云云今查邑中紳士華翼綸趙榮姚熙績戴敬熙過恩湛錢福基徐其曜過人遠陳錫慶畢觀揚安鴻勳楊瞻渭楊晉奎沈明揚周愛棠過振華錫嘏王承本須沛等共集捐洋銀五千四百二十

餘元均由縣署報解又李金鏞集捐銀五千兩華文滙宣敬熙陳蔭椿沈承祖唐錫晉楊殿奎汪煦熙張樹培蔡鳳沼等共集捐銀五千兩均由蘇局報解



無錫金匱縣志卷三十一終

席新安開化之間居民田事稍閒輒以織席為業成則鬻

於潁關虎邱之肆中

寰宇記邑之土產有龍鳳細席

甄瓦甄窰在望湖門外販鬻徧大江南北各郡雖自造豎

緻不如

宛山石色純黑可作硯品亞歛石在水中者佳邑人黃守

中手製者最貴重

宛山在常熟界琢而為硯多自邑人故舊志載此今仍之

陽山石咸淳志云風土記陸墟市東七十步有陽山出石

堪作礮曰始民未知開斲漢大夫陸端設有醴以祭後

取為器寰宇記引南徐記云此山石堪作器江東數州

皆藉此其石質麤而堅至今采之不竭



朱石出斗山

赭石出鴻山

青石出石室山及高山擇其質緻者可爲碑材

硃砂宋時邑橫山有大楓樹枝生芸香其下有硃砂墩產硃砂今無之

白堊出斗山及管社山

薯蕷出膠山唐時充貢見郡邑志今無之

茶橫山雪浪庵有數十株山僧于穀雨前採之曰本山茶香味不減洞庭碧螺春

蠶荳出惠山邵文莊茶田者味甘美

桂花栗出惠山不過十數株香嫩遠勝他處以桂花時成

實故名

蘭花笋出膠山萬玉亭前色白如玉香清似蘭他處所無

桃鵝鵠山錢桃塢有桃實小如錢而美今無之

紫蘇邑產爲最佳出東門外者尤勝他郡邑產名北支

薄荷出保安寺者佳亞於蘇郡學之龍腦

芡俗名雞頭出鵞湖華氏祖塋之旁產不及百畝居民多

取吳中所出雜以入市或臨視采之輒先置根下亦罕

真者近則萬安鄉之龍塘岸所生差堪伯仲

腐豉蓉湖尖所鬻者佳糧艘賈舶運之徧京邑及諸省會



白魚出太湖四時皆有惟五月中梅雨多則大上色瑩白如銀觸箸紛解鮮美冠時濱湖之邑惟錫有之次則吳江亦不及也

銀魚出鵞湖盛於晚春夏差減七八月盡矣其大如鍼結髮爲網取之昏水入白瓷碗中了不可見但黑睛兩點如砂浮著水而居人艤舟得魚傾入煖酒卽熟皆成小玉環好事者置本處水草中不用水養攜入城猶不失味然不成環矣近者興塘諸處亦有之

蟹出青城鄉玉圻者膏腴盈殼名玉爪蟹

黃雀集諸蕩萑葦最深處秋食稻粒其腴在尾黃瑩如蠟門神丹青人物極工甲於天下自京師以下販鬻無遠不至

硃砂箋邑俞氏所製純用硃砂積染而成膠法旣善用書春聯最利筆墨黏之屋壁及屏障間歷年久遠殷鮮不改後秣陵亦仿其法爲之不及也

堆紗刺繡前明尤仲驥妻俞氏所造早寡保孤業此自給巧奪天工曾以充貢今邑中或仿其法



祥異

水旱必書所以示儆至禳祥之說本五行志有驗有不  
驗稗史所錄博物君子亦往往道之今綜核舊志徵諸  
近事祇云記實匪侈異聞志祥異第三十七

晉

永嘉六年五月無錫歛生茱萸四株交枝若連理先是麤  
鼠出延陵羊祜令郭璞筮之遇臨之益曰此郡東明年  
當有妖樹生若瑞而非瑞辛螯之木也如其果然東西  
數百里有作逆者其後吳興徐馥作亂殺太守袁琇亦  
草妖也



義熙七年邑人趙末年八歲暴長八尺鬚髯蔚然三日而死

劉宋

元嘉二十一年木連理生晉陵無錫南徐州刺史南譙王義宣以聞

二十四年七月壬子晉陵無錫穀櫟樹連理南徐州刺史

廣陵王誕以聞

以上二條考乘據宋書補

宋

熙寧六年旱

紹寧元年大疫

按宋無此年號考熙寧淳熙間有紹聖崇寧紹興紹聖止四年而此下有五年事蓋非崇寧即紹興耳

五年六月大雷電蘇村一民家所用斗稱盡挂於門外大

樹之杪

淳熙二年水澇

嘉泰二年蝗自丹陽入武進若煙霧蔽天其集亘十餘里

常之三縣捕八千餘石

嘉定七年蝗遍於野

元

元貞元年五月水

天歷二年旱氣如焚疫癘大作



至順元年秋大霖雨民多饑死

二年春大札

明

洪武二十年旱河竭六月丁未戊申大雨水漲溢傷稼

二十五年旱穀價騰貴

二十九年大旱水竭禾槁死

建文三年地震飛蝗翳空

永樂三年大水米騰貴

宣德六年六月訛言有物食人自淮以南越本境抵蘇松

人心惴惴未昏鍵戶明火擊器終夕震驚踰月漸息

九年夏旱民饑摘草葉屑榆皮雜荳餅食之

正統八年夏旱秋大水

九年七月癸亥大風拔木水驟溢

十二年旱

景泰四年十二月大雪樹介冰厚尺餘

五年正月八日夜大雪及丈冰柱長五六尺積陰連月菜

麥皆死六月大水傷稼民薦饑

六年夏秋大旱民饑疫死者三萬餘人

七年秋蝗

成化四年六月旱水涸運道幾絕



六年三月壬午黃霧染人鬚眉

八年七月壬子大風雨如正統九年

十五年五月乙丑地震生白毛細如髮長尺餘九月丙子

又震生白毛

十七年春夏旱七月丙戌大風雨膠山水驟漲淹上福等

鄉壤民廬舍八月乙未風雨又作惠山安陽山水漲尤

甚人多死者歲大祲

十九年正月朔大雪越七日林樹冰結成花有氣如霧而

黑陰晦積日

二十年夏有物色正黑乘夜透窗隙攫人始自武進至六

月壬子延及無錫民間徹夜然炬持挺擊金鼓自衛浹

日乃已

宏治元年五月辛巳疾風暴雨竟日

四年四月泰伯鄉民家生豕一頭二身三百八蹠

七年七月己丑大風雨如元年

十四年十月十七日寅時地震

十八年九月十三日丑時地震

正德元年三月十二日北風大雷電驟雨冰雹平地二尺

餘十二月晦龍見有虹貫日

三年秋大旱



五年七月大水傷稼

七年七月十九日大風雨竟夕傷稼

十一年 月白水蕩蛟起壞民廬

十五年九月大水

嘉靖元年春錫山產芝夏秋旱七月二十五日大風雨拔

木平地水深數尺

二年大旱秋大水

三年十月七日有黑白二龍鬪於太湖之濱湖水皆赤白

龍敗

四年蝗

八年夏飛蝗蔽天秋大雨田禾皆沒

十年十月朔虎入熙春門

十五年大旱農家掘井以灌禾

二十一年夏有虹起第六箭河其光燭天

二十二年潮水至第六箭河甲子復至越五日己巳又大

至

二十三年自六月至九月不雨民饑疫死

二十四年大旱

二十六年九月閏月十月不雨十一月乃雨

三十一年大有年



三十二年天雨赤荳地生白毛

三十四年夏六月大水淹圩田

三十五年正月五里湖嘯中無勺水有二大魚死於湖濱

三十六年五月訛言有妖過江至無錫民間驚惶自衛如

宣德成化時

四十年大水深及丈彌望成川舟行入民居七月地震

四十三年潮水至第六箭河

四十四年六月二十四日夜大風拔木

隆慶元年八月初二日大風發屋拔木六晝夜

二年元日大風太湖水涸

三年潮水至第六箭河

六年壬申宅仁鄉陳幼學田內麥穗四歧考乘據陳筠塘事實補

萬曆元年十月十二日大震電

二年春潮水入西水關至學宮之前

十五年七月二十一日大風湖水驟漲民多溺死

十六年大水

十七年大旱河流絕死者甚眾

三十六年大旱

三十七年大水

四十二年三月二十六日民間訛言倭至頃刻爭入城有



相蹂躪死者

時邑人張汝陸手挈踣者活十數人載送其家

四十四年正月大雪雪有黃紅黑色屋瓦皆有巨人跡

天啟三年冬地震十二月二十二日申酉間地中有聲如

雷自北而南屋舍皆動

四年夏大水湖流泛溢舟行阡陌間

七年秋大風拔木蟲食禾歲大饑

崇禎元年秋八月有蟲嚙禾盡槁民多饑死

計六奇北畧載崇禎二年無錫災荒畧言自天啟四年至七年二年大水一年赤旱一年蝗蝻舊年八月以來突有異蟲叢生潛嚙禾之根節以入禾心觸之必斃民臨田大哭有自溺及自經者或磨薪作餅食噎而止或啖樹皮石粉枕藉以死時武進宜興災狀畧同知府曾櫻會入覲哭於戶部請改折以甦民困當事者持不可

五年元旦雪深四五尺六月二十五日大風雨傾屋拔木

冬十二月霰著樹成花作纓絡刀劍之形

六年六月二十五日大風雨拔木毀屋九月十八日風復

作如前

九年四月八日雨雹傷麥

十年四月二十二日雹大如拳甘露祝塘等鄉麥盡死秋

旱蝗

時南里人張元斗宿甫有掩捕之功

十一年蝗大至七月二十五日大風雨雹

十二年七月飛蝗蔽天歲大饑

十三年秋大旱天雨荳七月蝗傷禾



十四年春夏大水秋大旱而蝗米石三兩民多饑死  
十五年大疫死者相籍

十六年自京口至江陰無錫民曉起或見黑圈記其門或

見釜底畫梅花一夜殆徧考乘據綏寇紀畧補

國朝

順治七年夏大水淹官塘歲饑

九年大水六月江潮至城河

十一年大寒河冰盡合

十三年大旱

十五年八月五日未時地震

康熙四年冬大寒太湖冰官河絕舟楫者匝月

七年六月十六日戌時地震生白毛

九年春夏大水舟行田間歲饑虹橋民家一產二男一女

十年旱禾槁死

十一年有蝗不為災秋蟲食禾

十三年夏大水傷稼

十五年夏大水傷稼

十八年大旱官塘水盡竭歲饑

十九年大水浸及惠山之麓田盡淹民廬多壞舟行數百

里不循故道一帆可達民薦饑自是年及二十年旱澇



之後疫癘大作民間盡室閉門相枕而死村落為空

二十七年大有年

二十八年旱

二十九年三月之末民間訛言有妖火或變為人形及獠  
獠傷人所在秉炬鳴金持梃而譁其言亦來自武進數  
夕乃止

三十二年大旱九月澇

三十四年夏積雨傷麥食者皆嘔洩秋旱

三十五年春夏旱七月大風雨壞民居

三十七年旱疫

三十八年疫

三十九年旱十一月桃李華麥有秀者

四十三年旱歲饑

雍正元年旱

二年旱

三年旱

九年秋七月大風雨傷稼

十三年夏六月大風雨震電梁溪蓉湖間舟覆溺死數十

人

乾隆二年七月興寧鄉菰里有七龍見居民數百家屋盡



壤多傷死者

三年夏旱

五年夏雨雹傷麥

六年夏地震

十二年秋蟲傷禾

十三年饑米石三兩秋稔

十四年秋疫

十六年二月十八日戌時地震自春及夏霖雨傷麥

十七年四月初四日寅時地震越十餘日地生白毛

二十年八月蟲傷禾盡槁歲大饑民食草根樹皮殆盡

二十一年春大疫

二十四年秋蟲傷禾

三十四年七月膠山鄉過氏家中地出血

四十六年六月十九日大風二十一日方止木盡拔

四十七年夏江潮至城河

五十年大旱河水盡涸歲大饑

五十一年自春至夏無雷六月十六日始聞雷是年大疫

嘉慶元年正月九日大風拔木雪深五尺許

九年大水

十九年大旱



道光元年大疫

三年大水浸及惠山之麓

十一年秋禾被水

十三年自秋至冬積澇傷禾稼

十四年正月大雪深數尺

二十年六月大雨潰圩田

二十九年大水

咸豐三年二月二十七日訛傳粵匪至爭擁出城南吊橋

下踏斃二十餘人三月地震八月又震

六年大旱蝗

九年竹開白花半枯死

十年三月大雪

同治三年春西北鄉人相食

四年有獸類狗俗稱竹狗夜入村落噬人年餘始息

六年六月江潮至城河

光緒二年七月譁傳有物壓人夜輒鳴鑼相警聲徧城鄉  
又有無故失其辮髮者既而獲妖人數輩繫諸獄害乃  
息

三年五月大風拔木蝗入境不為災秋蟲傷禾十二月大  
雪深數尺



四年五月地震

又言無錫大邑地處吳晉楚而數次入漢軍梁陳諸國  
 大德二十九年十月三日地動百里人皆驚動地皆搖動地  
 八里上公八十餘里地動  
 又言無錫大邑地處吳晉楚而數次入漢軍梁陳諸國  
 大德二十九年十月三日地動百里人皆驚動地皆搖動地  
 八里上公八十餘里地動

無錫金匱縣志卷三十一終



